

四庫全書

集部

欽定四庫全書

集部

石倉歷代詩選卷三十四至七

詳校官庶吉士臣龍廷槐

侍讀臣孫球覆勘

總校官進士臣朱鈐

校對官中書臣范來宗

謄錄監生臣丁煜

欽定四庫全書

石倉歷代詩選卷三百十四

明 曹學佺 編

明詩初集三十四

貝瓊

雜詩

祖龍帝六合不暇談黃虞且復求神仙入海窺方壺置  
酒阜鄉亭超然忘故都空留赤玉舄安期今有無

又

種桑飼蠶桑葉何沃若種瓜待秋摘瓜蔓何漠漠春  
秋各有獲在野猶可樂君看金張館草深狐兔宅

結束將何之龍門訪陳迹戒途及良辰置酒別親戚迢  
迢越千里人馬疲登陟大江不可濟天方限南北悵然  
迴吾駕去從山林適

真真曲

姚文公為承旨時一日玉堂燕集聲伎畢奏有真

真者操南音公疑而問之泣對曰妾建寧人西山之苗裔也父司筦庫于濟寧坐盜用縣官財賣妾以償遂流落籍中公謂翰林屬官王棟曰汝無妻以此姬配汝吾即其父也貲裝皆出於公棟字棣華後官至翰林待制噫以西山之賢子孫陵遲疑不至於此然辱于始而正於終是亦天也簞谷筆談記其事予乃賦四十二韻而沉鬱悽婉亦足以盡其大畧矣

斷絲棄道邊何日綠長松墮羽別炎洲不復巢梧桐請  
君且勿飲聽我歌懊懷在昔全盛時冠蓋紛相從盤游  
易水上意氣天山雄金刀手割鮮酒給葡萄濃坐有一  
枝春秀色不可雙娉婷劉碧玉綽約商玲瓏寶髻金雀  
釵已覺燕趙空或聞操南音未解歌北風上客驚且疑  
姓字初未通問之慙復泣乃起陳始終妾本建寧女遠  
出西山翁父母生妾時謂是金母童梨花鎖院落燕子  
窺簾櫳迢迢官朔方南歸山水重侵貸國有刑桎梏加

父躬鬻女以自贖白璧淪泥中秋娘教歌舞聲價傾新  
豐永為倡家婦遂屬梨園工覽鏡拂新翠吹簫和小紅  
身居十二樓屢入明光宮京華多少年門外嘶青驄自  
傷妾薄命失路隨秋蓬不如孟光醜猶得嫁梁鴻客聞  
為三歎祖德寧未崇回黃忽變綠人事何匆匆有客傷  
緹縈無人憐蔡邕遣使白丞相削籍歸舊宗小史三十  
餘勿恨相如窮配汝執箕帚今夕看乘龍鴛鴦並玉樹  
鸚鵡開金籠銀甲不復整紅牙不復從提甕自汲水締

綌亦御冬應非事羊侃頗類歸建封琵琶感商婦老大  
猶西東崔徽怨頗類浪寫丹青客依依章臺柳落絮香  
無蹤小妾恨題驛竟與瓊奴同時多困坎壈事或欣遭  
逢焉知百尺井歛登羣玉峰借問為者誰內相姚文公

飲酒

六龍驟朝暮百川無西迴所以陶阮輩落魄事酒杯共  
盡生者樂勿為死者哀借問東方朔桃花今幾開秦皇  
及漢武求仙亦荒哉弱水三萬里何處登蓬萊與君且



一適隨意坐蒼苔

耕樂軒

隱者東海頭安時事耕鑿有田百畝餘相率治堯堉我  
稼沒牛腹我書掛牛角三洲雷雨均既耕必有穫吹簫  
賽田祖操豚不為薄上給縣官租酣歌見真樂江南風  
景異况乃賦歛數連雲桑柘盡池臺總零落尚恐兵未  
休遠近無土著全生虎豹羣豈忍厭藜藿

乙巳除夕

春風何處來庭草忽已碧不惜流年馳感此千里客管  
葛樹功名孔顏豐道德低回違宿願覽鏡雙鬢白高堂  
夜張筵新酒行琥珀得失誰與論浩歌永今夕

題尚北海聽雨軒

海門飛雨集高棟有餘清斜侵虛壁過遠逗大江平簷  
花朝亂滴庭葉夜俱鳴涼知蘇道暘潤喜躍園英微茫  
空暝色蕭瑟自繁聲飛蓋阻來遊獨坐軫深情

丙午七夕

生寡縻祿情不復就羈洩曝衣記蚤秋置酒陶喜節曲  
無二八舞味薦水羞潔輕紈怯迅飈明燭欺初月林鳥  
戾且飛玄蟬淒更咽主賓聊晤語兒女空感別耿耿候  
雙星漏終河漢沒

蘭

叢蘭何青青羅生滿中澤阿那風葉翻歲蕤露房折芳  
潔終自持光榮諒誰飾勿為時所化歲晚同荊棘

懷夏士文

樓船昔西邁霜降百草衰日月一何道子行忽經時衆  
綠榮枯條谷鳥鳴且悲豺虎塞道路鬱鬱勞我思我思  
晨復夜諒匪渴與饑行人發吳門消息安可知且復慰  
其私豈敢言是非惜哉無六翮念子何當歸雲中有黃  
鵠會啣東南飛

瀟湘夜雨

江空夜如何急雨千里洒水生黃陵廟雲暗蒼梧野鼓  
瑟來湘靈移舟近漁者重華不可見竹上淚如寫

漁村夕照

羲和忽西匿阡陌散餘輝  
澄江度鰲翼遙峰明半規  
孤煙野店起歸人一何遲  
遺榮羨父老衰白無所悲

題綠綺軒

朱絲操白雪白鶴舞婆娑  
猶聞廣陵散不廢懊懷歌  
風來茂苑樹月落洞庭波  
不見古人久焉知古意多

仲冬秋涇客舍

水涸天始寒爽氣薄締綌  
空林無榮木斤鹵草俱白紛

紛各有營驅馬不得息嗟予亦何者慘慘長路側饑寒  
恒累之豈不厭所歷北風來廣漠徒御皆少色踟躇但  
四顧白日忽西匿山川莽悠悠沿洄良未極索羣中野  
獸逐侶南去翼誰能獨無情歸哉山中宅

皂林驛

朝發白水村夕次皂林驛水腥無飲馬林黑有歸翮昔  
時兵交地白骨如山積萬竈今已夷風亭煥新飾居人  
尚星散父老悲故迹團團關山月夜逐南征客

春日宴滄洲詩 并引

歲在著雍涒灘春三月一日筠谷高士合賓客叙  
兄弟飲於滄洲一曲平地湧翠高閣延青圓景中  
天繁陰四合微飈遠激幽芳襲人清醪在壺嘉穀  
既旅徵蟋蟀之刺儉美伐木之求友終宴忘疲遷  
坐復酌鳴葭間發協朱鳳之相和舞袖雙回翩驚  
鴻之欲舉嗚呼蘭亭金谷會豈能常滄海流沙兵  
猶未息懟神仙之無驗宜曠達以為高用綴新篇

以紀雅集詩曰

天濶無留雲山明洗新黛過從屬休假置酒滄洲會柔  
荑綠堪藉雜英紅尚在累觴既不辭秉燭還相對清彈  
促哀響祕舞呈脩態蘭亭今已矣金谷徒增慨大化會  
有終四時寧復貸厭厭夜無歸從人譏倒載

采芝生詩

功名不可恃利祿恒為慙舉世紛螳集伊人倏鴻騫十  
年不出戶上友綺與園金芝敷九葩煌煌生石間朝陽



晞宿露光輝一何鮮采之備服食度世希神仙永謝塵  
市人振衣百尺巔黃虞悵已遠肆志獨超然

讀史自諷

周爨久不仕身屈名四馳玄纁一旦至舉族更勸之安  
知脩道者出處亦有時慨然中途返獨守東岡陂

久客始歸寓井西舊宅述懷

在路日思歸已倦風水艱前經石門店喜見西南山憶  
我初去鄉忽忽三十年兒童盡成老比隣無復存阡陌

金定以八  
卷三百十四  
迷東西甲第空毀垣秋風落古木方池榮夏蓮倏忽驚  
世換豈獨遇神仙蕭蕭井西宅白晝惟高眠所欣無維  
執貧賤何足歎

晨興在父山作

夜雨四簷絕坐待扶桑瞰天高無餘滓初景方晏溫黃  
鸝萃霜木白雁來寒門所欣居處幽已忘趨走煩時枉  
道人過或逢田父言傷哉亂離後衣冠今幾存賦歛日  
已亟何地為桃源結茅向絕境牧豕學公孫

早春

山寒花尚遲雪霽江已綠懷新感遊子吟節喧衆族且  
同尊俎樂幸免章綬束更擬登前峰青郊可遊目

擬出塞曲

翩翩荆楚士結束赴幽州將軍豈樂戰匈奴為我仇已  
通大月氏更取烏珠留驅馬白狼北洗兵青海頭歸來  
飲高廟庶雪平城羞

送吳濬仲

弱冠知君名五十始逢君  
南宮托同宿十日披清文  
及我備脩纂缺近幽蘭芬  
茲言歸故鄉告別那忍聞  
姓姓中林鹿猶能念其羣  
況我同心友去住從此分  
夜度淅江水朝看天姥雲  
春禽正嘒嘒夏木方欣欣  
安得遂同載歸耦沮溺耘

出都門一首寄張孟兼主事

日落宿都門雞鳴發淳化  
城南夜來雨連山色如赭  
青松夾高崗煙火通旅舍  
到家須十日畬田熟秋稼  
如何

山巨源未知嵇叔夜野鶴終去人疲牛豈勝駕寄書謝  
所親吾今老林下

初冬

一氣變昏旦洞房風露淒田禽亦已化秋蘭同蒺藜為  
客久成老懷人終未夷慘慘白日暮迢迢歸路迷世衆  
不獲騁天遠何由稽永思讀書臺言采山中蕨

擬東野

破屋夜通月霜氣刀稜稜病骨不受寒卒歲仍無繒殘

金定已  
卷三百十四  
燈吐復翳僵卧如凍蠅事業漸蒸沙文章空縷冰已失  
國士意頗為年少陵長歌獨慷慨坐候東方升

送錢公擇還象山

金陵一杯酒送子歸海隅五月南風正荷花滿鏡湖登  
堂酌春酒上奉雙親娛但惜千里別莫贈鮫人珠雖同  
天地間一旦吳越殊皎皎渥洼子翩翩丹穴雛悵然不  
得從遠望白雲孤

禮部員外張惟中七月十二日暮歸賦詩八韻

秋至星火流病覺中歲劇成均忝分教才非一狐腋日  
入欣慙休野老或爭席清談雜虛無以永風月夕百年  
會有盡富貴非所適鳴蟲亦知候倦鳥思假息脫冠已  
童然如何拘百役酒醉不復言道固存目擊

秋懷

露下百草變淒淒天地秋亦如中年客玉顏安可留山  
鳴迅商激水涸行潦收恩方改團扇意復存散裘梧桐  
葉盡脫孤雛夜啾啾光景忽已逝感之雙涕流

題畫竹

太史公紀渭川千畝竹此圖僅盈尺而遠意不翅  
千畝觀其毫枝髮葉歷歷可見於秋煙暮雨外筆  
法視古亦精已寓目久之遂起於余兩山之興徑  
欲買舟歸卧其所云

市朝非素心林壑契玄賞讀書甘寂寞密竹更蕭爽衝  
人虎豹經閉戶蠅蛸網寒梢朽不蠹野筍苞初長風生  
回鶴夢月出聞猿響如何猶戀祿廐馬存病顙相期結



二仲茲焉共來往

題朱孟辯層巒圖

疊嶂何崔嵬遠近皆可數不學王宰遲棄墨如棄士林  
藏風雨黑石戴冰雪古初疑造化鍾已覺精靈聚遙思  
兩山下流泉細通圃茅屋今何如人去苔生戶

古意

春風天上來滿城紅與紫如何朝暮間飄落隨流水堂  
前兩冬青霜雪猶不死向來三月時誰言及桃李

滁陽驛

羣山繞滁州城郭帶林壑豈惟居人稠遂使遊子樂  
苜蓿青滿野羊馬盛幽朔况酌豐泉下懷賢意蕭索

雪蓬小朵歌送奎方舟還靈鷲

蓬婆雪嶺高崔嵬橫絕青天飛鳥回山中小朵更奇峭  
石作蓮花千葉開巨靈擘山斷山脈一峰夜向東南擲  
千秋乾竺空有名萬里峨眉盡無色攢青疊翠分西湖  
洞口白猿猶可呼咸和之年有慧理卓錫尚愛飛來孤

木杯高僧兩看雪身如濁水青蓮潔繙經石上不知年  
桂子年年落秋月

鳳凰山歌

大城周迴三百雉紫薇閣對吳山起天目西來為鳳凰  
蒼然不過錢塘水玉輦金輿北去賒行人折盡上陽花  
杜鵑夜叫葛洪井燕子春歸蘇小家燕歸不識更新主  
王氣淒涼作風雨城南楊柳鬱金黃一束纖腰為誰舞  
題王立本山水圖

我有愛山癖每欲名山去秦溪一日寄新圖歌枕高堂  
觀雲霧何年王宰留真跡青城天彭接太白金堂石室  
猶可識大樹小樹叅天直千盤百折分秋毫木客時與  
行人遭一門通天劒閣險三峽漲雪瞿塘高小舟如鳬  
爭入浦嘔啞卧聽雙鳴櫓拾遺近在浣花溪却面龍湫  
結茅宇豺狼塞路何由通采芝亦有商山翁安得相從  
向絕境振衣千仞來天風

張靜婉采蓮曲

妾長平康里能舞復能歌髻斜梳墮馬看淺約彎蛾陌  
上遊人顧門前俠客過塗黃初拜月拾翠欲淩波已知  
一身重不受千金喚十五事秋娘十六歸羊侶願妾比  
雙蓮為君朝暮鮮君能重妾綢繆意別起高樓大道邊  
春乘油壁香車出夜入流蘇甲帳眠高樓下俯平湖濶  
照妾濃妝並淡抹五月平湖水正深盪舟相逐起雙禽  
置酒都門歌激烈丈夫得官貴少年腐儒窮經空白髮

題子昂秋林早行圖

北上莫渡河龍門如天誰敢過西遊莫趨蜀瞿塘如馬  
誰敢觸大星未落月掛樹行人出門向何處日日西東  
往復來青山不斷天涯路天涯路險更無窮破表羸馬  
怯秋風日高茅屋猶未起愧爾山中白髮翁

團扇詞

團扇何皎潔誤放雪與月雪當有時汚月亦有時缺妾  
恨似天長君恩成雨絕昨夜秋風長信來星河已見西  
南回妾有新詞詎堪寫夜撲流螢玉階下

山市晴嵐

山光洗新黛好雨不崇朝日遲蒙薄霧天近靄微霄茅  
茨猶隱約金翠鬱岩嶠前峰恐無路有客度危橋

遠浦歸帆

楚客發天際揚帆入三湘回首青山遠忽已過潯陽晚  
樹何歷歷歸思浩茫茫永愧波上鷗漁父共相忘

董逃行

北風破肉邊兵利漢將驅人死邊地丈夫四出婦女號

長安十日城門閉夜入南山忍衝虎尚勝迢迢隨捕擄  
城中有地盡蓬蒿城下何人種禾黍夜聞董逃四面歌  
却思鄉土淚滂沱

雨中

江南正月如臘月花開未開春尚慳空中白雨急飛瀑  
海上黑雲深抱山老夫閉門愁不出十日西窗聽蕭瑟  
公卿韉馬五更朝且獨高眠舒我膝銅雀破瓦不補天  
哦詩強學號風蟬荒村無路竹雞喚載酒何人尋鄭虔



白頭為農計亦足棄書耕田買黃犢

穆陵行

至元中番僧楊璉真伽利宋諸陵寶玉因倡妖言  
惑主盡發殯宮之在會稽者斷理宗頂骨為飲器  
璉敗歸內府九十年矣洪武二年正月詔宣國公  
求之得於僧汝訥所乃命葬金陵聚寶山立石以  
表之余感而賦詩一首

六陵草沒迷東西冬青花落陵上泥黑龍斷首作飲器

風雨空山魂夜啼當時直恐金棺腐鑿石通泉下深固  
一聲白雁度江來寶氣竟逐妖僧去金屋猶思宮女侍  
玉衣無復祠官護可憐持比月氏王寧飼烏鳬及狐鬼  
真人歛見起江東鐵馬九月踰崆峒百年朽骨却南還  
雨花臺下開幽宮流螢夜飛石虎殿江頭白塔今不見  
人間萬事安可知杜宇聲中淚如霰

題火龍烹茶圖

并引

右火龍烹茶圖蓋寫古帝王事而斷縑落粉半為

好事裂去獨有茶具及黃衣中使拱而立者二人  
烹茶者二人曲江錢善定為唐之玄宗豈嘗見其  
全歟然人物位置要非院工所及未暇考譜以實  
之姑為賦詩一首題其左云

松聲一作秋濤雄銅龍吐火鱗甲紅黃衣中使備玉食  
泉出金沙甘露濃春風一旗色尚活建溪山人雨前掇  
蓬萊殿裏沃蕉餘玉盃分沾侍臣渴名花喚起海棠魂  
細葉未數丁香根宮中一日歌舞散世上千秋圖畫存

金野史卷之十四  
卷三百十四  
開元盛事何人省書生亦解誇  
雙井空山掃葉燒破鐺  
閉門讀書秋夜永

虀羹吟

清江老人腹空洞白首談經恥無用  
酒酣入水問河神  
乞我黃虀三百甕平生不羨將軍腹  
冰壺先生真我族  
山妻日宴且朝飧露葉桑根甘勝肉  
君不見海上巨族  
如公侯詔書夜遣官兵收

余避地千金圩屢游艾史兩山酒酣興發賦詩

一首惜山中無賞音者空桑亦同於瓦器耳  
姑錄以自娛云

神人夜割蓬萊股蒼然尚作青獅舞  
父基得道此飛騰  
煙火千家自成塢前年盜起官軍下  
存者如星纔四五  
我來欲置讀書牀出入未愁穿猛虎  
山寒月黑無人聲  
夾道長松作風雨佩環何日歸公主  
泉下桐棺閤千古  
放浪豈知公與侯玉臺王母自千劫  
海屋老人今幾籌  
青春無價須秉燭明朝花落令人愁

題徐復初參政驄馬圖

青驄萬里來安西五花滿身玉削蹄將軍大雪騎出塞  
風鬃未洗龍城泥何人落筆通造化天上房星降中夜  
朱衣老奚驚有神不獨開元數曹霸漠南漠北千帳空  
將軍賜爵論邊功此馬豈與凡馬同解鞍落日從遠放  
黃金臺高春草豐

胡虔雪獵圖為徐復初賦

太古天驕宅幽朔平沙四面無城郭生兒豈識種禾黍

走狗呼鷹共為樂北風颼颼大雪濕越塹凌岡馬蹄急  
弓開滿月不虛發赤豹玄熊號且立日暮兩狼歸掛鞍  
燕支勸酒左右彈一時快意良不惡金刀割鮮行玉盤  
君不見漢家天子獵四海塞下將軍歸奏凱青丘雲夢  
何足誇猛虎長鯨肉俱醢

十月三日過梧桐涇時官籍僕彥宅妾龐氏唐  
氏自經感而賦之

天寒水清石齒齒杏葉初黃豆花紫舞榭歌臺不見人

頭白烏啼月明裏當時豪俠輕五侯一榮一枯八十秋  
綠珠亦解死金谷草露作淚無時流

送迨士霖歸天台

赤城雲氣神仙家千樹萬樹蟠桃花十二樓臺起花外  
石門水長通胡麻當時劉郎亦草草出山却憶山中好  
莫信丹丘日月長玉人已共桃花老山空水流雲自飛  
劉郎看花須早歸

題華山圖



太華五千仞石色青如苔  
嶄然表西極肇自鴻濛開河  
流破石雷霆激父老空談巨  
靈跡山寒五月疑清秋鳥  
飛不度仙掌側我欲上從羽  
客雲臺間錢鎖高懸尚可  
攀千葉池蓮食之久不死明  
星玉女相往還相往還人  
間萬劫纔一息峰頭大笑驚  
下方日落咸陽秋草碧

贈乘槎客

六月淮南不知暑閉門日日風和雨  
乘槎仙客何處來  
把酒張燈連夜語酒酣示我楮機石  
曾到天河見河鼓

人門倏忽三千秋，弱水三枯海黿腐。吳爭越戰空陳迹，  
山繞錢塘作龍虎。柳外樓臺十萬戶，太平重自南朝數。  
吳娘玉面勝梨花，解向尊前胡旋舞。樂極哀來泪相續，  
城郭秋深半禾黍。內前樹老啼寒鴉，山月無情照今古。  
白首相看亦偶然，忘形何必論賓主。天為酒星地酒仙，  
麒麟將相皆黃土。約我他年一擢歸，西湖煙浪從漁父。

題趙子昂松石修篁圖

白髮王孫老薊門，逢人只說山中趣。酒酣落筆有天機，

寫作陰厓百年樹一株偃蹇龍蛇影繞屋風聲三伏冷  
流脂入地成琥珀死骨經雷縮人癭森森竹石俱蒼然  
一日坐我天姥前王孫跨鶴歸何年山空月明啼杜鵑  
送王克讓員外赴陝

貂裘萬里獨衝寒舊是含香漢署官白雪作花人面落  
青山如鳳馬頭看關中相國資王猛海內蒼生望謝安  
應念東南有遺逸採芝深谷尚盤桓

寄內弟陸熙之

金野史卷之十四  
卷三百十四  
我別禦兒溪上宅月當二十四迴新如何萬國尚戎馬  
即恐四隣非昔人簫鼓誰家猶作社樓臺廢苑不成春  
夜寒憶爾無由見悵望黃姑析木津

題雲溪耕隱

屋外青山青似蓮雲溪隱者即神仙桑麻杜曲非無地  
雞犬桃源別有天載酒隣翁時叩戶賣魚溪女不論錢  
卧龍何事煩三顧祇合隆中老歲年

題丁成之清樾軒

九龍山前處士宅草堂低小盡青苔樹陰滿地日不到  
水氣著人秋已回無數黃鸝相對語有時翠碧忽飛來  
移牀與客竹間坐十里好風何快哉

雲間見李克敏將歸吳陵作詩為別

與子西東二十霜尚思年少醉錢塘人間日月如行客  
馬首山川忽異方歷歷早鶯初變語翩翩歸雁未成行  
明朝陌上重分袂更盡吳姬酒一觴

靈鷲觀燈

天樂風傳應壑雷驚峰春色似蓬萊一天象緯迎秋轉  
千月龍宮徹夜開西國胡僧依樹坐上方玉女散花來  
夜深借榻山房宿更欲題詩到二臺

七夕

滄江雨歇暑漸微銀牀一葉迎秋飛牽牛相對織女出  
明月不照征夫歸寸心耿耿祇自苦興髮蕭蕭今更稀  
仰候神光向中夜秋螢暗度鴛鴦機

二月十六日雨中遣興

城頭落日啼乳鴉城中煙火冷千家斷雲漠漠夜還合  
急雨紛紛風更斜世亂不歸空洒淚春深何處獨看花  
白龍堆前水二尺明日泛舟攜紫霞

清明日陪楊鐵崖飲城東門是日風雨

盪舟撾鼓出東門怪雨盲風野色昏海上一春猶作客  
樓頭三日共開樽青山石馬新人塚錦樹黃鸝舊相園  
快意百年須痛飲轉頭何處不銷魂

重午

北里共持菖歎酒南翁未解木棉裘白波青嶂三吳地  
恠雨盲風五月秋揮淚幾時朝鳳闕招魂何處覓龍舟  
海榴一點紅如火時序催人共白頭

白蓮

太液初花宿露團香濃粉淡不勝寒金莖側瀉仙人掌  
玉葉危擎帝子冠水濶天空愁欲墮風清月落好誰看  
西湖腸斷西施采一曲菱歌唱未闌

錢塘秋夕



殘蠟無光小院幽  
梧桐一樹更蕭颼  
西陵風雨來清夜  
南國山河入素秋  
雞唱四隣呼客夢  
雁回千里帶邊愁  
可憐季子貂裘敝  
遲暮何為賦遠遊

遣興

我住雲間今四秋  
恰如杜甫在秦州  
賦詩黃耳塚前去  
打鼓白龍潭上遊  
暮景飛騰如過翼  
此身浩蕩一虛舟  
黃塵九陌繞車蓋  
且伴老翁隨海鷗

客居

移家處士橋西畔六月蒲蓮暗野塘乳鴨成花能黑白  
風蟬隔葉自宮商買田不待沾微祿垂釣須教具小航  
自比成都浣花叟旁人應是笑清狂

風涇定光寺周回三里皆荷花彷彿有錢塘西  
湖之勝與筠谷高士同賦

南風隔浦聞花氣菡萏紅開十里花宮女三更環白帝  
洞庭千頃落明霞鑿池不待煩靈運載酒渾疑過若耶  
何日與君追勝賞滿船明月唱吳娃

初冬口號

朝來吉語解離憂  
四海銷兵戰伐休  
地闢堯封皆內屬  
江通禹鑿已安流  
復見老生談俎豆  
遂聞壯士脫兜鍪  
種瓜好覓青門地  
我亦為園學故侯

答宇文仲美

五兩夜逐秋鴻徂  
十年避兵無定居  
君今不奏子虛賦  
我亦終返班生廬  
踰鴟如斗足野飯  
江魚研玉分玉餘  
更種南山豆一頃  
試看兒子帶經鋤

冬日漫興

天陰十日猶未解臘月荆揚氣候偏雨合樹聲來夜半  
風催花信立春前酒徒已老今何處狂客不歸殊可憐  
山茶一株欲爛熳百壺留我醉新年

寄陳性天

汎掃天壇事老君即從年少悟竒文青童汲井朝分乳  
玉女裁衣夜染雲水上赤魚還可駕山頭白鶴自成羣  
遙知客去能長嘯月冷天空半嶺聞

雨中書懷

漢苑秦宮跡已陳，金沙一簇為誰新。  
山河有恨空懷古，風雨無情只送春。  
南國鷓鴣愁北客，東家蝴蝶過西隣。  
尊前莫唱昇平曲，白髮秋娘也自顰。

雨夜

寒夜悲吟似夜蛩，銀缸何事結花紅。  
愁聽風雨三更盡，夢在波濤一葉中。  
神女佩環歸楚館，鮫人機杼靜珠宮。  
連陰未解何由旦，翅濕南飛萬里鴻。

至日

獨客無家望轉迷  
山空木落氣淒淒  
愁催短髮渾如鶴  
病覺長身不稱屨  
書斷薊門天萬里  
棹經秦樹雪千溪  
何由去學神仙術  
一鼎丹砂夜自泥

送桑子村歸縻塘

書囊未了復晨雞  
歲暮扁舟出大溪  
司馬倦從枚舉客  
伯鸞欣對孟光妻  
山通石屋風煙合  
海接天河日月低  
一路梅花千樹雪  
春來約我酒重攜

十二月廿六日蔡叔庸至剪燭聽雨

水氣昏昏接海邊清江狂客繫吳船  
天風十日河冰碎夜雨三更瀑布懸  
寂寂春光歸柳上匆匆離色在花前  
故人著屐能相過剪燭西窗話昔年

題山水四景

雨前雨後花滿川春風浩蕩殊可憐  
山入日高眠不起勸酒提壺花紅裏

青林五月不知暑玉女曬衣中夜雨  
客至清談酒更添

白楊梅煮薦吳鹽

田家酒熟當早歸天氣漸涼催授衣  
一夜西風破霜蘂芳菲不共芙蓉死

天雲漠漠四野低大山小山玉笋齊  
春還何處尋消息花發枝南與枝北

石倉歷代詩選卷三百十四



欽定四庫全書

石倉歷代詩選卷三百十五

明 曹學佺 編

明詩初集三十五

方孝孺

四月一日蒙賜宴浣花新建草堂感恩懷古偶  
作

靈雨過瑤階朝陽麗金殿吾王講藝餘特賜羣儒宴茲

惟杜子宅遺址當郊甸盛代仰前脩高堂歛重建葺茆  
昭舊迹拓地增新觀棟宇極崇華簷甍儼雕煥兩楹陳  
綺席仙醴兼珍膳列坐無俗賓街恩共酬勸花溪浮砌  
淨雪嶺當窗見覽物獨興懷古人如對面追思天寶後  
宇內疲征戰徒抱稷契心莫覩唐虞禪薄游經險阻放  
意娛篇翰使獲遭聖明寧令老貧賤人生鮮遇合自昔  
共嗟惋並世或棄捐千秋有相羨吾曹獨何幸淺技蒙  
深眷難酬國士知空為昔賢歎江山鍾粹美天地存幽

贊佇俟英俊興重閱盛文獻

休日奉陪蜀府諸公宴集

居閒歎時邁閱世知才短頗為觀國遊每覺歸期緩  
羣公盡耆英過從恨殊晚他鄉親故稀骨肉不在眼  
非資談咏歡孰使離情展大藩仰仁哲政化崇寬簡  
長日自優游茲辰况休澣牲醪出珍賜果蔬隨物產  
一觴偶成酬萬慮皆可遣貴同周士肆狂笑晉人嬾  
語樂天趣深心清市塵遠新秋欣已至毒暑行將斷  
靈雨席上來微

涼座中滿明時古難遇良會世所罕各勉存令猷垂聲  
繼伊管

次王仲縉感懷韻兼呈張廷璧

東京多節士我懷管幼安騰身風塵表寵祿寧肯予  
魚不相諒高位屢超遷腐鼠欲見汙聞之愧心顏皜皜  
由夷姿迥出兩漢前彼哉阿世者變滅同飛煙榮華神  
所戲貧賤節斯完此道匪難知胡為人不然

其二

始見澤腹堅又聞谷風至炎煇復能幾木葉俄已墜四序  
不少停景物日夜異思之熱中腸不遑食與寐支離如  
病鶴顧影獨長唳黃雀飽稻梁笑爾獨垂翅

其三

野性拙生理大化無停機緼袍汗沃若絺綌風淒其壯  
士千載心豈憂食與衣由來浮海志不是軒冕姿人生  
尚聞道富貴復奚為賢哉陋巷樂聖切西山饑朶願多  
所失苦節未可非

舟中呈同召葉夷仲林公輔楊大中陳元豐

本乏適用才誤為當世知進身愧塞拙退處乃其宜何  
意承寵光使車忽來茲靡靡踰南國秩秩錫多儀嚴程  
不可稽王命自有期親愛俱在眼弗獲顧我私聖猷同  
山岳微忠劣毫絲黽勉諒何補徒興千載思

偶爾遣意奉呈同學諸君子及示叔貞秀才

累物擾靈府澹然無所為家貧自鮮營萬事俱不知日  
祿餘一斗粗給蔬與廩林田亦易耕有酒供四時門多

儒雅客暇則斟酌之相對靡俗言共談止書詩遊情或  
深契歡笑同解頤孰謂千古遠其人如在茲于心有至  
樂天地亦可遺未知軒裳貴寧論是與非

發褒城過七盤嶺宿獨架橋閣上

名為不祥器斯理昔未覺及茲困奔走始歎立論確險  
哉七盤山羊腸凌巘嶸三年數往返顛頓髮早白此行  
當盛夏溽暑逞餘雪晝伏避蚤蚤宵征越林薄危橋帶  
褒水俯瞰波流惡鑿石勞衆工緣崖構飛閣下扶千柱

壯上倚浮雲弱怒雷地底鳴懸瀑崖際落山中郵傳少  
過客資淒泊勞者務苟安寧思非所託更闌急雨至洪  
濤相噴薄鬼神助晦冥天地混磅礴病身倦輾轉酣寢  
絕疑愕晨興宵景澄林壑還可樂有生大化中萬變相  
綜錯所遇聽自然何處匪安宅歷聘魯中叟詠歸沂上  
客勞逸命分殊順俟安敢擇

秋林道旁有橙樹處荊棘中不知幾何年矣會  
增置驛舍芟夷堂基斧斤幾及遇識者知其



為菓實之美也獲免築室既成正值窗牖間  
結實累累然可愛過而見焉感而為之賦詩

橙生蜀山裏蕪沒荆棘場荆棘忽剪除孤根虞見傷幸  
遇識者顧扶植不忍戕築室適在茲窗牖正相當花垂  
素雪盛葉茂青雲張方秋氣盛肅原野飛早霜衆木不  
復榮百草已罷芳累累枝間實爛爛半青黃摘置樽俎  
間几席有餘光豈惟巴人羨南服亦罕嘗鬼裁帝王宮  
異味來萬方何以解煩渴甘酪間蔗漿此物倘前陳玉

食倍馨香可令積疾蠲坐見人情康惜無先容者盱彼  
途路長遇世良有會處已貴安常歲寒善自保用舍隨

行藏

乙丑中秋在石鏡精舍因士友翫月後二日家

兄寄示會飲分韻諸詩覽之悵然歎不得與

因奉次來韻兼東鄭君好義

我家南山中正見秋月圓我家豈無此兄弟况滿前胡  
為輕別離顧影清輝寒賴有坐上客共結無窮歡愁端

旋消釋言笑各開顏寄謝兄與弟明年相對者

其二

秋霽月正好山谷氣逾清風簷敞虛牖愛此萬里明嘉  
賓自遠至樂飲暢高情雄談振林谷頃令懷抱傾叢桂  
因荊棘時來吐芳馨物生尚有待吾意詎無成且終良  
宵會難值衆美并酒酣發長嘯似聞鸞鶴聲惟恐日易  
出顧影遶庭行

郭西精舍士友同宿

淹懷終歲思幸際清宵會情深新喜集語愜孤愁退離  
居積頑鄙處下多尤悔倦翮謝騫騰羈蹤損貞介含悲  
靜自慨抱獨招羣怪非子不我遺斯心誰復賴天寒四  
野寂雲歛踈星大霜葉響枯條水灘咽鳴瀨振衣逞玄  
覽妙趣超塵瑳靜圻一氣先虛涵萬象外林泉皆道情  
縻組本天械擺落已遺榮過從敢辭憊祛疑異閤論立  
懦佇明誠顏風尚可還勗德期無懈

歲除祭先奉懷家兄次文公先生病中呈諸友

韻

日月行不息我亦安居違家今幾何忽復五載餘微  
官悞人事解令親者踈每想別時語不見空中書及茲  
歲將闌感歎正躊躇祀先具薄奠撫已懷厥初觴酒豈  
云乏獨酌憂難祛寧當解組去御子花間車

再次石鏡精舍會集韻

風日澹秋晚欣此嘉會并賢豪昔同調泉石非舊盟祗  
應念離別忽作山中行雄談為絕倒空谷騰歡聲論時

涉風雅深夜張華燈義交無老少情親如弟兄齋中二  
三子侍立環兩楹把酒起為壽禮秩交相迎丈人名文  
章落紙誠世英珊瑚與玉樹對之敢譏評乃知高世人  
不為塵俗縈秋空白雲散悠然暢遐情嗟予尚穉劣夙  
心會簪纓沈潛守編簡愁對寒蟲鳴豈知金石韻鏗鏘  
振林垞重茲頌秀句願言當服膺匪徼一時譽終期千  
古名

初冬雨中獨坐

吾廬混人羣來往劇鼃黽頗欣夜雨來頓使塵蹤屏滔  
滔流水障悄悄耳目靜風窗試展書佳趣倏已領平生  
煙霞癖夙昔慕箕顓抗懷軒冕上雅志星日炳寧知墜  
俗流汨沒未遑逞奇懷獨不忘幽念時自省豪雄外身  
名曠士賤鍾鼎欲語嗟莫同長歌碧林暝

書錢氏家山圖

錢君望鄉勞夢思陳君奮筆為寫之毫端歛吸驅鬼物  
風霆捲地山川移紫雲峰高當面立獅子灘聲轉山急

翠竹搖風市塵遠青楓夾路樵歌入山脚盤迴到石門  
桑榆深映數家村百年丘壟澤未泯中古衣冠今尚存  
高堂老人年八十皓首紅顏腫點漆柴門拄杖望兒還  
坐聽庭鳥心若失錢君一見增喟傷此身如在淮水旁  
摩挲門戶欲歸去細看無路墜渺茫乃知陳子善戲劇  
故假丹青惱胸臆世間萬事無不然畫地作餅安可食  
陳子亦是憶家客不特戲人兼自釋沙際扁舟已上檣  
何當共載歸故鄉



紅酒歌

田家八月秋林黃  
腓肩滿擔金穰穰  
西城萬室喜登場  
斗酒勞慶年豐祥  
天台山人傳秘方  
釀成九醞丹霞漿  
紫檀槽頭秋點長  
絳囊醅壓甘露涼  
猩紅顆滴真珠光  
蓼花色比桃花強  
薦新設席請客嘗  
風吹桂花滿屋香  
饌出肥雞一筋肪  
橙斫蟹膾雙螯霜  
不須琥珀瑤瑤觥  
寧用太白力士鎗  
我愛真率田家郎  
磁甌瓦盆罌木觴  
爛熳為我澆吟腸  
新詩吐出雲錦章  
醉來興發恣豪狂

高歌起舞當斜陽出門一笑爾汝忘大江東去煙茫茫

寫懷

子規聲裏吳蠶熟星繭纍纍照人目踏車已作春雷鳴  
我獨無人冷機軸繭老蛾飛爭奈何愁端零亂如絲多  
故人一去不復返祇有血淚如春波新婚已盟未諧耦  
青鳥傳音在春後青春會少離別多心事殷勤向誰剖  
君不見古井淵源百尺深欲汲未得勞人心井深百尺  
君莫恨但恨繩索無千尋

扇

寒藤陰壑懸風霜剝皮擣骨收溪光銀漢半邊秋月白  
瑤臺一幅春雲香青旗翠纛湘潭竹寶刀纖纖破寒玉  
東來十二碧琅玕鳳骨凝香冷盈掬吁嗟造化由天功  
乃知製作歸良工膠漆投情作鸞偶卷舒懷袖生清風  
清風飄飄可人意忽覺聲名滿天地南州溽暑恩情多  
只恐涼飈入庭樹

題李白觀瀑布圖

天寶之亂唐已亡中興幸有汾陽王孤軍足馬跨河北  
手扶紅日照萬方凌煙功臣世爭羨李侯先識英雄面  
沈香亭北對蛾眉眼中已見漁陽亂故令邊將儲虎臣  
為君談笑清邊塵朝廷策勲當第一珪組不敢繫天人  
西遊夜郎探月窟南浮萬里窮楚越雲山勝地有匡廬  
銀河掛空灑飛雪醉中信馬踏清秋白眼望天天為愁  
金閨老奴污吾足更欲坐濯清溪流

海米行

海邊有草名海米大非蓬蒿小非薺婦女攜籃晝作羣  
採掇仍于海中洗歸來滌釜燒松枝煮米為飯充朝飢  
休辭苦澀不下咽性命聊假須臾時皇天不仁我當死  
况乃催科急如矢來年擬作日月期欲保餘生更俟爾  
嗚呼棄止不復陳椎牛酣酒為何人

閒居感懷

鳴鳩知天雨乾鵲知天風蟋蟀最無知亦悲年運窮云  
何當世上憤憤溫飽中變故如波濤浮沉淒所終

其二

鳳隨天風下暮息梧桐枝羣鷗得腐鼠笑爾長苦饑舉  
頭望八荒默與千秋期一飽諒易得所存終不移

其三

乘時功易立處下事少成君看蕭曹才豈若魯兩生賢  
豪志大業舉措流俗驚循循刀筆間固足為公卿

其四

習俗日頽壞疇能塞其源自從井牧廢開此爭欲門救

弊豈無術得君古難言田間一卮酒踈酌蒼梧魂

題山水

昔隱林壑中不知林壑美今來在城闕見之心輒喜  
楓林新受霜茆茨隔秋水安得呼扁舟遨遊五湖裏

楊柳渡

殘月墜遙天涼風在高樹人行野色分鳥嘯巖光曙  
川平愜幽眺境勝遺塵慮日出小舟橫依依楊柳渡

宿夾江寺

窗開覺山近院涼知雨足淡月透疎櫺流螢度深竹心  
空慮仍淡神清夢難熟起坐佛燈前閒抽易書讀

懿文皇太子軌詩

盛德聞中夏黎民望彼蒼少留臨宇宙未必愧成康宗  
社千年恨山林後世光神遊思下土經國意難忘

其二

監國儲皇政憂勞二十年龍樓方愛日鶴馭遽賓天已  
失羣生望空餘萬世傳長江一掬淚流恨繞虞淵



其三

斥土開瑤殿因山近翠微  
神輿離鶴禁天淚濕龍衣  
日月還丹闕風雲送六飛  
太平皇業固清廟詠光輝

應召赴京道上有作

搖落秋冬際蒼茫鄞越間  
青山欹枕過白鳥背人還  
問俗鄉音異消愁酒債慳  
虛名果何物不使病夫閒

題曲徑

曲徑潛通市高墉遠背村  
醉眠忘作客靜讀懶開門  
古

學嗟中絕羣經續已繁平生刪述意深恐負乾坤

次韻奉寄好義

初旭濕霜痕溪流緩復奔路因頻到熟心待舊交論山  
勢隨村曲窰煙接海昏知君多善教所至俗還敦

其二

聞說幽居僻仙鬟翠嶠南陽坡饒美木曲澗會澄潭問  
俗何方古藏名此地堪深期帶經往清夜擁爐談

其三

混俗非真隱深居學避囂  
看雲山映竹坐石水通潮  
道勝貧何病神完趣獨超  
遺經對千古意頗似聞韶

次韻答錢文學

幽亭斜日在佳興與君同  
屐潤催時雨衣涼醒酒風  
鷺羣穿草白蜂足帶花紅  
愁散身殊健全寬雲夢胸

題畫

得意支郎畫分明是米家  
亂雲浮雜樹遠渡卧枯槎  
白屋孤舟迥丹崖一徑斜  
何時共漁叟洞口訪桃花

其二

曲折成千里雲山儼一鄉  
林疎茆屋見水落釣舟藏  
世路羊腸外仙家鳥道傍  
此身何處着箕穎意難忘

謝羣公送別

賤士何須送羣公不世情  
聽雞朝謁後並馬出郊行  
心戀金門遠身依玉樹榮  
愁來今夜月兩地向誰明

遣病

底用憂微疾人多悔久生危  
危機非畎畝高枕豈公卿  
千

古斯文託羣經此日情廢興天命在得酒且須傾

其二

急雨張燈夜匡牀伏枕時食貧宜客少身病願春遲  
道豈斯文著才非聖世遺用心耕鑿外榮辱竟何施

其三

飲酒留杯底攤書礙枕旁人扶脩盥櫛客勸罷文章穀  
雨催田父花時到海棠病夫渾不較流轉任春光

其四

病久身渾憊醫疎術易窮囊空宜勿藥跡滯尚飄蓬禮  
樂周秦後乾坤橐籥中數行憂國淚江海與俱東

人日從蜀王登萬歲山

黿首高臨紫極開五雲長日擁蓬萊  
嵩呼魯獻君王壽  
人日今從帝子來寶仗鳴鞭金騷裊  
石牀扶座錦莓苔  
才華愧匪朝陽鳳飛蓋華隆喜共陪

登歸雲寺閣

棲身丹壑總忘歸水閣頻登趣不稀  
雨脚斜侵耕叟笠

苔花青匝定僧衣  
山餘積雪寒猶壯  
岩墜流星曉更飛  
卜築何當居此地  
玉堂金馬任相違

宿新津寶花寺

百丈岡頭佛寺開  
晚涼停轡陟崔嵬  
落花亂逐溪流瀉  
歸鳥低銜馬箭回  
雲外老僧鋤筍蕨  
樹根童子掃莓苔  
景清愛借禪房宿  
不為叅玄聽講來

送吳主簿

西關短簿衆稱賢  
太華峰前坐五年  
心為嫉邪曾奏事

家因好客不留錢  
霜寒茆屋雞聲早  
月落江城雁影偏  
此去京華遇鄉使  
好將嘉政萬人傳

次韻兄調弟希政并柬鄭叔度

鄉閭儒術許誰加  
弟唱兄酬興未賒  
經濟有心慚薄德  
安居無事任貧家  
日高甕牖蜂穿紙  
潮落江汀雁聚沙  
却歎離居趨侍日  
時來相對卜燈花

題山水

離家今幾載  
衣袂染京塵  
不敢看圖畫  
青山恐笑人



病中除夕

數漏掩殘歷中宵氣候殊獨憐愁共病不與歲同除

遊蛾睂山紀行

西蜀雲山處處奇最奇人說在蛾睂想應踏遍千崖月  
露滴松梢鶴夢時

中秋對月

南鄭荒墳草木寒東甌舊宅桂花丹  
又向孤舟獨自看

墨菊

解印歸來鬢已斑故園松菊可怡顏祇緣三徑荒涼久  
特寫秋花仔細看

其二

分根昔日向東籬種近羲之洗硯池幾度來澆池上水  
花間朵朵墨淋漓

鸚鵡

幽禽兀自嚙佳音玉立雕籠萬里心只為從前解言語

半生那得在山林

石倉歷代詩選卷三百十五

欽定四庫全書

石倉歷代詩選卷三百十六

明 曹學佺 編

明詩初集三十六

練子寧

題黃彥成雲林小隱

有客素肥遯幽居愛林廬結屋依陋巷種樹繞城隅浮  
雲南山來清陰覆其間老柳帶寒色芳蘭露春腴窗深

不知曉樹密室自虛甘貧意自適守道樂有餘娛賓非  
肯酒飽食但園蔬流水赴大壑翔禽戀高林物性各有  
遂誰能常宴如所以古人隱為時而卷舒商嶺豈高蹈  
渭陽非遠漁惟有巢由子千載烈丈夫

駿馬歌

君不見穆王八駿遊天路跡徧寰宇尚無度會同王母  
宴瑤池賴得君牙挽周祚又不見明皇幸蜀八馬龍天  
寶不及開元中漁陽鞞鼓烟塵黑玉環妖血鞍韉紅君

看玉蹄三十二莫是披風逐電驥殘陽一片雨餘天芳  
草何年牧窮地幽姿逸態汗血新風鬃霧鬣騰踏勻一  
嘶一躍各有趣或行或止森同羣奚官控出塵飛動豈  
是造父王毛仲麒麟雖在地上行光價合為天下重摩  
空猛氣猶騰驤出世即論周與唐吾皇不受千里獻黃  
金樂施涓人方駿兮駿兮渥洼種際會風雲擅才勇還  
君此畫歌我辭玉勒長嘶毛髮疎

水竹居詩

高人結宇修篁裏  
軒戶玲瓏映流水  
庭皋月轉翠陰生  
溪上風回青浪起  
翠陰青浪映窗扉  
曲徑臺深客到稀  
林下移牀揮麈坐  
沙頭繫艇釣魚歸  
柴門無事臨流敞  
高卧支頤聽清響  
千山暮雨石泉通  
一夜春雷籜龍長  
几席清幽俗事疎  
波光盡日映圖書  
何年得遂辭塵坱  
杖策相從此卜居

待月歌

天風吹桂香  
夜久露華結  
清興誰與同  
停杯待明月  
明月



月須臾海上來青天一望無塵埃人看明月皎如昨日  
照人間知幾回人生何用歎與嗟月本無心尚圓缺玉  
兔搗藥能長生不管麻姑髮如雪月既照我飲我且為  
月歌舉杯勸月月亦喜清波歷亂揚金波願把紫鸞笙  
雙吹向寥廓直上蓬萊第一峯坐聽霓裳奏仙樂

樵谷歌為雙峯饒子弘賦

金川南上佳山水翠壁丹崖相對起玉山三十六芙蓉  
都入樵翁笑談裏藤蘿縛屋薜荔衣朝往青崖曛暮歸

松陰遺世時高枕谷口行歌日看棋昔年我作金門客  
素衣半化緇塵黑當時拄笏望西山始信漁樵不輕得  
今年奉勅又朝天手展詩囊索贈篇移文未許山靈誚  
伐木終期友道全丈夫出處須知命軒冕山林總天定  
他年我亦謝官歸遲爾長饒綠蘿逕

三月望日與饒隱君子宏遊玉笥山

我懷謝康樂獨往遊名山身同雪舟繫心與浮雲閒清  
風淡蕩灑六合令我興在雲松間玉山高與南斗齊雲

錦照耀廬山低三十六峯凌虹霓飛湍噴雪臨迴溪長  
松挂月青猿啼上有梅仙採藥之幽棲下有蕭雲讀書  
之故基洞天石扇杳莫測瑶草謾長三春蕞我欲因之  
覽八荒手拂青蘿眠石牀回飈吹散碧天霧清冥倒瀉  
澄湖光作為玉山謠寄之雙峯客興來攜妓秋復春笑  
殺東山謝安石

玉山謠贈時憲

我所思兮玉山之岑嵒采芙蓉兮凌丹霄謫仙一去已

千載至今誰續廬山謠熊侯家住劍江側慣掃秋山之  
黛色聞余此興為寫之彷彿梅仙舊時宅梅仙兮何在  
邈清風兮滄海寒夷猶兮孤舟弔遺跡於千載舟中所  
載非凡流羌故人兮李與周按玉笙兮明月下黃鵠兮  
清秋洞天兮石扇蒼崖兮路轉橫余劍兮視八荒訪蓬  
萊兮幾清淺張侯兮昂藏驂白鶴兮青霓裳窺玉梁之  
寶笈醉石髓之瓊漿千岩萬轉路莫測酒酣一笑三山  
窄待得君王賜鑑湖錦袍重訪山中客

輞川釣者圖

家住璜溪上金川似輞川涼風垂釣坐明月棹歌還綠  
水雕胡飯金鱗縮項鰻鑑湖如可乞相與頌堯天

與謝伯大會宿石溪寺次日贈竹隱上人

高僧號竹隱開寺大江邊如意懸書室絮絮上釣船樓  
臺開世界龍象接人天記得連牀處松風夜不眠

贈魯生師德東遊

羨子多才藝臨風感慨深琴彈別鶴操聲作老龍吟落

落平生志悠悠太古心東遊萬里道到處遇知音

贈郡庠張允真作蘭卷

楚楚張公子山林興甚長行舫思澧浦隨筆寫沅湘劍戟青雲濕衣衫夕露涼伯英書法在奕葉繼遺芳

戲簡文儀歸郊居督工刈稻

丹桂映秋楓江村九月中思歸緣穫稻憂國願為農霜薄蒹葭渚秋高鴻雁風齊眉如有饋應不媿梁鴻

周子林讀書樓

藏書貽矩誨僻地起高樓  
月露連書蓄星河拂檻流  
蘭膏長照夜竹簟正宜秋  
窓迥伊吾遠簷高緯絡愁  
分陰思積學暇日坐消憂

廷試作

天子臨軒策治安近臣如雨侍金鸞  
百年禮樂成周典一代威儀陋漢官  
文氣夜連奎壁動龍光晴射斗牛寒  
董生莫負天人策學術須期百世看

出試閣早朝

銀燭光中烏夜啼，棘闌清撤候晨雞。  
西窗聽雨妨清夢，上苑看花憶舊題。  
玉氣曉瞻雙闕上，文星夜貫五雲西。  
明朝珂珮朝天去，金殿春風玉筍齊。

讀書臺

閒抱瑤琴訪百花，上人還與論三車。  
能分香積厨中飯，慣煮孤山雨後茶。  
洗墨池荒秋草合，讀書臺古夕陽斜。  
壁間正好題詩句，留取他年護絳紗。

小姑山



姑石嵯峨不可攀，粧臺更在白雲間。  
瓊林下壓龍蛇窟，鐵鎖高懸虎豹關。  
使客未鳴蒼玉珮，江妃先譚綠雲鬟。  
江南莫道無形勢，筍立天門第一班。

送人之官

雨霽清流玉滿川，錦衣携袂立沙邊。  
旋沽南石橋頭酒，聊送東風江上船。  
行色一枝春在柳，去程千里水連天。  
待看考績歸來日，細聽鶯聲奏管絃。

牡丹為黃公器詠

不因紅紫競芳菲似與天公別有期  
金縷織成雲外錦珊瑚長出海中枝  
一欄國色君須記滿袖天香我所思  
陪賞喜同諸俊彥醉歌渾似洛陽時

淦江書屋為李宅賦

故人家住大江邊又踏鷗波已七年  
養鶴亭深栽竹地讀書窗裊煮茶烟  
論交有道慚垂顧推轂無能與薦賢  
莫道相從忘忘風昔梅花冰雪歲寒天

乙丑三月訪予白兄于秦淮橋

五月南風水倒流秦淮橋下問扁舟  
穿花燕子羽毛濕  
隔水人家門巷幽  
心憶庭闈瞻楚樹  
身陪冠冕侍瀛洲  
吾兄歸去如相問  
衣綵終期慰白頭

近郭產瑞蓮二枝同鄒孟彰楊德顯何仕璉賦  
羅襪香塵太液池  
凌波化作玉蓮枝  
始知秦虢承恩日  
不似皇英望狩時  
翠袖相携誇窈窕  
銀屏雙倚鬪腰肢  
明年獻頌甘泉裏  
朱草嘉禾未足期

賦得孟義科斗送監生楊仲文歸台州親迎

孤石巉岩出紫烟雲根遺墨尚依然文章豈在龜疇下  
形質還存鳥跡前汲冢秋風思汗簡魯堂春雨閱韋編  
郎君歸去和鳴後織作機中錦字傳

送周望往四川

駟馬橋邊秋水波郎君此去意如何衡陽雁陣驚寒早  
巫峽猿啼入夜多一水東來通漢沔衆山西上接岷峨  
少陵祠宇清溪曲為瀉瓊漿試一過

贈醫士習以質

藥爐丹火映晴霞見說桐林是習家  
衣拂松雲窺石髓  
瓢分崖瀑飯胡麻  
豈無董奉林中杏  
亦有安期海上瓜  
待我蟾宮通桂籍  
從君金液鍊金花

送人之京

天子龍飛辟俊才  
金灘江上錦帆開  
龍泉劍自豐城出  
明月珠從合浦來  
玉氣曉浮鵲觀  
文章宵應鳳皇臺  
錦袍公子仙丹侶  
金榜東風取火催

灞陵樵牧為謝伯大賦

新築茆堂面翠微  
瀟陵風景更依稀  
拾薪路險莓苔滑  
放犢林深笋蕨肥  
卜式肯將金換爵  
買臣安用錦為衣  
他年斤斧相尋處  
牛角懸書候夕暉

郡庠胡子溫以楊侯所題弓裘賦遂為書此

七寶雕弓鶚血紅  
使君高誼孰能同  
鼎湖猶憶封侯壯  
蛟浦徒誇漢武雄  
空谷扣絃驚夜月  
上林飛箭待秋鴻  
桑弧自有平生志  
未數麒麟第一功

解嘲

秋來逸興浩如雲閒拂霜華看劍紋莫怪風流謝安石  
未應憔悴沈休文驂騑神駿寧論肉鵬鷗身輕更出羣  
千載征南不穿札至今猶作晉元勳

送周子澄之歷城

難兄佐邑持風裁令弟辭家篤友于風雨幾年疎共被  
關河千里轉征車天垂鉅野河流急秋迥江南木葉疎  
他日到官煩問訊琴堂詩思夜何如

次答本素上舍

滿城車馬自相求，高卧衡門四壁秋。  
翡翠蘭苔嗟後識，蒹葭玉樹愧同游。  
葛洪峯下雲連岫，陶侃臺西月滿樓。  
不有故人能見問，此中高處有誰儔。

杏林書屋為姜思彥賦

萬卷堆牀樂有餘，年來種杏繞階除。  
花每見蜂環屋，結實嘗聞虎守株。  
窗下簡編勤肄習，籠中藥物富收儲。  
朝廷政在需材急，安用藏名好學居。

寄曾得之



高鳥知還久倦飛分甘萬里邁王畿虎頭食肉侯何用  
雞舌含香事已違博望尋源經月去長卿為蜀暫時歸  
寄言玉笥雲中客終擬相從採薺薇

洪武庚午元日試筆

扶桑日轉曉瞳瞳千樹梅花雪未融酌酒吟春瞻北極  
升堂賀歲遇東風天垂華蓋青雲近地接仙源玉澗通  
二頃石田今廢盡獨持書劍望年豐

送淦城百花寺僧竹峯請度牒南歸

風入茗堯紫禁長五雲垂影綸天光緇衣素識龍鸞氣  
墨版新承雨露香杯渡海門秋渺渺錫飛淮甸月蒼蒼  
賜還有待南歸日為訪支公卧石牀

早朝和友人徐子權韻

曈曈旭日上東山金鎖齊開虎豹關霧靄爐烟當鳳展  
風傳臚唱肅鷄班呈來八駿花前簇朝散千官柳外還  
回望蓬萊猶咫尺薰絃奏撤五雲間

和韻答傅彥武

放逐南還孺子鄉扣舷誰與泛滄浪有懷採藥尋方士  
無復聯班侍子皇夜雨桐花當戶落春風蘭茝隔簾香  
讀書未了平生志深愧雲林卧石牀

罷直圖

草詔下金鑾宮槐白露寒紫騮驕不控明月在欄干  
為百華寺竹峯上人題梅二首

粲粲珠璣服娟娟玉雪姿東風庾嶺路春色在南枝  
勁節傲風霜出花粲瓊玉春滿九霞觴羅浮新酒熟

山水小景

玉筍諸峯翠逼人  
天鴈汀鳬渚近連  
老翁日暮不歸去  
釣得槎頭縮項鱖

題墨梅

姑射山人玉佩環  
瓊簫和月上青鸞  
素衣不受緇塵染  
留與江南歲晏看

郭子成入關詩卷

岳翁乘棹章江日  
曾約先人泊畫船  
若問周南留滯者

不才金匱守遺編

先人交契若雲烟  
最說君家外舅賢  
我有愁心似征雁  
隨君千里到秦天

秋日作

水精簾動桂花風  
湘簟涼生八月中  
魄落西窗銀燭裏  
烏絲雪璽寄秋鴻

重午日答友人

青鳥新傳錦字詩  
高情非是故相違  
歌鍾滿坐風流客

不稱山人鶴氅衣

奉題匏菴所藏畫二首

鶴羽脩脩弄月明  
簷簷谷裏暮寒生  
憑誰截作參差玉  
吹出伶倫嶰谷聲

百尺長松石上栽  
紫雲深護碧崔嵬  
綠簑坐釣磐陀石  
細雨斜風不肯回

題梅

月逢三五光纔滿  
梅遇陽回始著花  
禪定湛然忘色相

不知疎影上袈裟

又

老禪心跡本來空  
却與寒梅臭味同  
昨夜苦吟清不寐  
雪花開徧月明中

石倉歷代詩選卷三百十六